

Ni jínubonjo apuñne duniyaño

Emisiyongo arenninno.

Iblisa ajodjod Adama ingi Awa k'ankaan ho Díino adígumne. Andóm bídimerenku sinongo s'anéerumehne búpájulo hójoonino ingi hójondonjo.

Jantentenj Gúloku Díino.

⁶ Angu udikaamo afég bídimerenku sinongo n'ayaane ajóon, ingi n'asúnkunehne búdomo. Afak awosen maro aji adómi alóndaháneh iniman n'asíibane gulóndaño. Bawoseni hómár afat k'adóm. Badómi adék anah údiigenkinem ki úmár mees adóm.

⁷ Bandómi anlónnda k'anlenta maro
ingi búdumbulahoor gangune. Angu
andék anyiker jalugo k'anluf ankaan
bayaah k'angéena. (Jenes 3:6-7)

Guliiho, Adama ingi Awa anrohroh. Jandin
bankaanumne ho Díino adígumne,
yikireng jaroh. Kanda inini, n'andómne
bídimerenku sinogo s'anéerumehne
búpájulo hójoonino ingi hójondogo,
anlentalenta, ampápájul mara ingi
búdimbulahoor gangune. Angu anrohroh.
Anríf bújooninku bayaaho ingi jalugo
k'ankaana, kanda anrohroh dáde.
F'anyennehinne kíng hu Díino n'adékinahne a
toolo angír ankuba mara anrohroh.
Anrohroh mara ingi búdimbulahoor
gangune, kanda anfak anroh mara
ankankaan ho Díino adígumne.

Gunakiino, ambenuhbenuh. Díino
atéekineeniŋteekin mara aji andómi
bídimerenku sinoŋo s'anéerumehne
búpájulo hójoonino ingi hójondoŋo,
anniirohuneh. Inini, andómdom.

Anyennehin kíŋhu Díino n'adékinahne a
toolo. Karo Díino akankáneh h'ayéjne ?
Kara immerenŋ anniirohuneh ? Ambenuh
dáde, k'andék ankuba.

Jandiŋ bandómumne bídimerenó, ayikyik
biñankayo bájeginenku immerenŋ ingi Díino.
Kanda inini anrohroh. Ambenuhbenuh Díino
k'andék ankuba. Biñankayo bájeginenku
immerenŋ ingi Díino alekaleka.

Jantentenŋ Gúloku Díino.

⁸ Afúrumi na, fo bísibaŋo agillenne
anyennehin kíŋhu Díino Umuyhintor

a toolo. Banyennehini kíḡhu Díino
andék ankuba a munnoḡo ki daha
afégeeniḡ. (Jenes 3:8)

Hoge Adama ingi Awa ampiren ankuba ki
Díino dafégeeniḡ ?

Wówo, pirendenḡ. Díino apápájul nip.
Apiren afég nip. Afégeeniḡfeg f'andómne
bídimerenku sinoḡo s'adíḡumne. Afégeeniḡ
k'ankubane.

Aji inkaanoonunḡ ho Díino adíḡumne, Díino
apiren afég mintor. Haani báhándo ni júuno
baháraḡ, haani a gufaco n'amurul, Díino
gafégefeg nip. Dimpirenoḡ ínku bahoḡ ki
Díino dafég mintor.

Angu, Díino alahun Adama ingi Awa
n'ankuba a munnoḡo k'ahuyor Adama.

Jantenteŋ Gúloku Díino.

⁹ Kanda Díino Umuyhintor adék
alahuneeniŋ k'ankubane k'ahuy
údiigeeno k'ayéjem :

- Fi umoraŋ ?

¹⁰ Údiigeeno awaala ayéjem :

- Memomiye ! Iyennennehin kíŋhen
a tooło, ibenuh maro n'igune ingi
búdumbulahooro. Gúmár akanne
ídek ikuba.

¹¹ Díino ayéjem :

- Hantaŋ ajellihinenne maro ingi
búdumbulahoor gugune ? Eke gúmár
ingine údomdom bídimerenku sinoŋo
s'ídiigumne búdomo ?

¹² Údiigeeno aŋoyindem ayéj :

- Udikaamo mu fi úneteemne k'aguy ukokaykum, úmár anaheemne bídimereno k'ídom.

¹³ Údiigeeno balóbi nim, Díino Umuyhintor ayéj udikaamo :

- Hóge úpápájul h'okanne ?

Udikaamo awaala ayéjem :

- Me, busumoolo ajodeemne k'ídom bídimereno bímár. (Jenes 3:9-13)

Angu, Adama ingi Awa ankomb sinjodamay. Adama ayéj Díino mara udikankánam akaanemne k'adóm. Ayéji : « Udikaamo mu fi úneteemne k'aguy ukokaykum, úmár anahemne bídimereno k'ídom. » Udikaamo mees, atéekin Díino mara busumoolo akaanemne k'adóm. Ayéj Díino : «

Busumoolo ajodeemne k'ídom bídimereno
bímár. »

Jamaŋo ampokunpokun sinjodamayo
k'anyéjeh índukoŋo gankankeeniŋne.
Impokunoonuŋpokun sinjodamayo. Kanda
alikiyaama, bísibaŋo bi Díino alekhinehne
balóbo, hóge impiren injodamayon a
gubaarhu jínubonkintor ? Hoge ipiren íyej :
« Kanda úduk akanne k'ikaan hójondoŋo. »
? Wówo, dipiren k'ijod Díino. Jamaŋo
ampiren anjod índukoŋo, kanda dupiren
k'ujod Díino mara Díino apápájul nip.

Angu Díino anohum alób ingi busumoolo.
Alób ingi Awa k'akir alób ingi Adama.
Jantenti h'ayéjne guliih busumoolo.

Jantenten Gúloku Díino.

¹⁴ F'alóbine nim, Díino Umuyhintor
ayéj busumoolo :

- Inini, idankahuno a gubaarhu
h'okanne. Didanka abónojo nip
ininkaman n'ídekehne gudankakan.
Fi ba barej gidankakánehne danko
inno : Ubááhinankáneh búyeken a
réejo k'údom gúbono baman da
uniirohunehe. ¹⁵ Me Díino
ikankáneh ki fi ingi udikaamo
ufoyayen. Faka imberenku udikaamo
ingi imberenken anfoyayhineh
baman dagurumaaren. Kanda
ayikhineh úduk a dimbayahu
udikaamo m'afilihinehe bigokon,
kanda fi ukabhánam a buteeñ.

Nim Díino ayéjne busumoolo. (Jenes
3:14-15)

Díino, f'ayabne busumoolo, kara fam
arinkinem ajónjooner, kara ayikyiker hádih,
pájiironon ? Kanda ímpájuloonon mara fo
Díino adankane arinku busumoolo, a waato
nómár gakumansáne gúbááhinanku
búyekinem. Biriman waato nómár jamaño
anfoyayne ingi busumoolo. Ganfégem,
ambujom.

Kanda Díino, f'alóbne ingi busumoolo,
alóblob ingi Iblisa mees n'akubane a arinku
busumoolo. Gúlobo gúmár funaare.
Amenuhmenuh, kanda ho Díino ayéjne
ajónjoon dáde. Jantentiteemun hóbun ho
Díino ayéjne Iblisa.

Jantenten hóbun Gúloku Díino.

Kanda ayikhineh úduk a dimbayahu
udikaamo m'afilihinehne bigokon,
kanda fi ukabhánam a buteeñ.

Nim Díino ayéjne busumoolo. (Jenes
3:15b)

Iblisa, f'ajodne Adama ingi Awa
akontankontan. Gúduk ayéj : « Me igañene
! Ipuñpuñ ho Díino ayabne. Biñankayo
bájeginenku jamaño ingi Díino alekaleka.
Me igañegañe ! » Kanda Díino ayéjem mara
ayikhineh bísiba bi úduk afañánahánam.
Ayikhineh udikaam m'aboshuneh wol. Wolo
úmár alaamedir, afilihineh bigoku ámár
Iblisa.

Horan ingine hómár ? Hoge Iblisa ayikyik
bigof ? Wówo, ámár fáguh. Yikireñ arin.
Angu, horan akanne Díino ayéj Iblisa :

« Úduk a dimbayahu udikaamo afilihineh bigokon. » ? Nim agune, wolo mu udikaamo aboshánehne, alaamedir, afañánaháneh Iblisa dáde.

Jantenteŋ Gúloku Díino.

¹⁶ Balóbi nim, Díino ayéj udikaamo :

- Fi mungu, udoohdir búyeero,
ibocinkineh kunyokon ingi banuyonjo
ba guŋano dáde. Haman nim
úsiibaháneh k'uguyon ingi
údiigenken. Úmár aguyhune
ulaameken. (Jenes 3:16)

Díino atéekintee kin Awa mara n'adómne
bídimerenku sinoŋo s'adíigumne, añantay
ayehenem. Buyeheno búmár aguyhune
umbu. Awa ingi indikaamo nip
m'anguyhune a duniyaŋo, gandoohi

búyeer anyoh dáde. Ganṅay guṅano,
annuy. Faka, inini udikaamo aguyhuneḥ a
karuhu údiigenkinem. Údiigeeno aguyhuneḥ
ulaamekinem.

Inini, iliirehineḥ ho Díino ayéjne a
gubaaṛhu Adama.

Jantenteṅ Gúloku Díino.

¹⁷ Balóbi nim ayéj údiigeeno :

- Inini, fi n'údomne gúloku
udikankan k'ufoola bídimerenku
sinogo s'ídiigumenne búdomo
idankahuno didiiraṅo. Inini n'ukanne
nim, duniyahan nip uñantay udoho
fanfanṅ buyikum gufoolaṅo. ¹⁸ Faka,
japoño jajóndonṅo ingi járámbáluṣeṅo
awalháneh a didiiraṅo. Japoñhu
kanaṅaṅo aguyhuneḥne gufoolahen.

¹⁹ Marigen! Úgiifhineh maf buyikum
gufoolaŋo baman da uniirohunehe
k'unŋoolin ufak uguy didiira. Kuku
ulenta mara ingi didiiraŋo
giyabumenne kanda unŋoolinkineh
ukaan didiira.

Nim Díino ayéjne údiigeeno.

(Jenes 3:17-19)

Díino atéekinteeKin Adama mara n'adómne
bídimerenku sinogo s'adíigumne, añantay
ayehenem. Fo Díino ayabne duniyaŋo,
hoŋon hoŋon h'agune na a duniyaŋo
ajónjoon. Yikireŋer honj ho jóndonŋ a
duniyaŋo. Japoño jajóndonŋo yikireŋer.
Tinoŋo t'ampuñohne jafoolaŋo yikireŋer.
Biniironŋo yikireŋer.

Kanda fo Adama búuñaaaraŋne gúloku

Díino, Díino adanka didiirango. Japoño jajóndongo ingi jálindo, ininkaman jarámbáluseño akomb buwalo. Bawuco ingi tinongo ampuñ jafoolango. Inini, buyikhu jafoolango aléerhineh dáde.

Díino adankadanka didiirango. Kanda afak adanka arinenku ñanraagofongo. Fo Díino ayabne Adama ingi Awa, yikireñer raafus mbañ banér b'alah arinenkinin. Anjébjeb kañ ! Kanda inini Díino ayéjeeniñ mara banéro ungu raafuso alakáneh arinenku ñanraagofongo. Inini ñanraagofongo anniirohuneh.

Jantenteñ Gúloku Díino.

²¹⁻²² Afúrumi na, Díino Umuyhintor adék adooh básedeño k'ajóonind Adama ingi udikankánam bayaah.

Bajóonini mees adék anéereeniŋ
k'ankaana. Angu Díino Umuyhintor
ayéjoora : Inini údiigeeno úmár
amímiir ingi mintor maro úmár mees
apájulahinpájulahin hójondoŋo ingi
hójoonino iniman ni mintor
ímpájulahinoŋne. Inini dajóon
k'adék afat adóm bídimerenku
sinohu kanjébo. Agi akaani nim
asimayaháneh baman
dagurumaarenj.

²³ Gúmár akanne Díino Umuyhintor
atibaar Adama afúnnom a Toolhu
Iden awúyenem bíduk k'adék alááful
didiiraŋo di Díino ayabumemne.

²⁴ Batibaar Adama ingi udikankánam
mees, adoohor maleekaŋaŋo
aninkeeniŋ na ba bumarahu

burukumbanku toolo. Maleekaŋaŋo
ámáráŋ, cerubonjo ganretuhne.

Awonnulineeniŋwonnulin a
burukumbaano b'agune bi bísibaŋo
afúruntohone ki nim wúur daŋan a
toolo nómár. Maleekaŋaŋo ámáráŋ,
noŋon noŋon alah busandi bu kuulo
afútoŋ k'anyíirimbineh a
burukumbanku toolo ki nim wúur biki
apút na a sinohu kanjébo.

(Jenes 3:21-24)

Fo Díino ayabne Adama ingi Awa,
biñankayo ayikne bájeginenku immeren ingi
Díino. A waato ámár, Díino
gankokayekokay ingi immeren a toolo.
Galóbolob ingi immeren ki immeren anlóboh
ingi ámár Díino. Toolhu Iden kantíg

kanjóoni mara Díino agune na. Kanda inini,
n'ankanne ho Díino adígumne, pirendenje
k'anfant anguy na. Horaŋ akanne? Díino
añantay afúnneeniŋ na mara Díino
pirenden k'anguyay ingi ñanraagofonjo
m'anyikne jínubonjo.

Úpájuli, Díino arenrenn fet. Pirenden
k'anguyay ingi mi rennáreŋeŋe. Inini, ni
Adama ingi Awa ankanne hójondonjo, inini
immeren rennáreŋen a gúbidhu Díino.
Gúmár akanne afúnneeniŋ a kantígo ka
ámár Díino agune.

Bafúnneeniŋ mees, adoohor maleekaŋaŋo
awonnálineeniŋ a burukumbanku tooło
k'ammara ki dahi wúur aŋan. Biriman
waato ámár, pirendenje anŋoolin a tooło
k'andóm bídimerenku sinohu kanjébo.

Pirendenjeṅ anjéb bandór. Inini,
annirohuneḥ! Pirendenjeṅ anṅoolin a
kantígo kanjóonino ka Díino agune. Díino
akankaan h'ayéjne. Inini, ambénaybenay
ingi Díino.

Angu, mintoronṅ nip inguyoneṅ jaraku
Adama ingi Awa. Mintor mees,
ginkankoonunṅkaan hójondoṅo. Mintor
mees, rennáronṅonṅ imbi Díino. Mintor mees,
ímbenayoonunṅbenay ingi Díino a gubaarhu
jínubonkintor. Gúmár akanne akaan ni
Díino aṅantingantin. Fo Díino adankane
Adama ingi Awa, mintor mees gadankane.
Gúmár akanne ayikyik japoño jajóndoṅo
ingi jálindo. Gúmár akanne raafuso ingi
banéro alahah jamaṅo. Gúmár akanne
biniironṅo ayik a duniyaṅo.

Angu, Díino ayabyab ñanraagofonjo
k'ammíir ingi Díino ki biñankayo apiren
aguy bájeginenku ñanraagofonjo ingi Díino,
ki ñanraagofonjo ampiren anguy imbi Díino
a kantíg kanjóoni bandór. Kanda ni Adama
ingi Awa ankanne hójondonjo, ni
ñanraagofonjo anyikne jínubonjo, manini
biñankayo bájeginenku mintor ingi Díino
alekaleka. Díino n'arennáne, dapiren
k'anguyay ingi mintor ni rennáronjonje.
Manini, ñanraagofonjo ambénaybenay ingi
Díino. Anniirohunek k'anguy bandór a
kantígo kajóndonjo, kantígo k'ambénayne
ingi Díino.

Kanda Liibárfu Gúloku Díino mukuron
nanka. Uyennehinkinej ho Díino akanne
k'ajóonin bájeginenku mintor ñanraagofonjo
ingi Díino. Díino akankaan honj ki

biñankayo apiren afak ayik bájeginenku
mintor ingi Díino. Damiñ, uyennehinkineḡ a
gubaarhu ho Díino akanne.